

La curt episcopala a Cuira

Sedia da la diocesa e perditgas da la cristianisaziun en Rezia

■ La curt episcopala è in areal situà sin in grip sur la citad da Cuira. Ella cumpiglia la catedrala, il chastè episcopala sco er turs ed edifizis gruppads enturn la curt interna. Tar las perditgas da la cristianisaziun en Rezia appartegnan er la baselgia da Son Gliezi che fa oz part da la Scol'auta da teologia e las restanzas da la baselgia sepulcrala da Son Steffan, situadas sin il territori da la scola chantunala a la Halde. A Cuira, il center da la provinza Rezia, è attestà il cristianissem tras l'uestg Asinio (451) e tras ils edifizis cultics dal temp cristian tempriv: L'emprima catedrala, da la quala las restanzas



èn situadas al pe da la catedrala odierna, è vegnida construida en l'emprima mesadad dal

5avel tschientaner. Da memorias dal temp roman tardiv (baselgias commemorativas da sontgs) èn resortidas las duas baselgias vischinantas da Son Steffan e da Son Gliezi. L'onn 451 ha signà l'uestg da Com ina brev sinodala, redigida da l'uestg da Milaun per mauns dal papa Leo I, era en num da l'uestg absent Asinio da Cuira («pro Asinioe ecclesiae Curiensis primae Rhaetiae episcopo»). L'uestgieu da Cuira, menziunà per l'emprima giada en quest document, è eventualmain vegnì fundà gia en il 4avel tschientaner. El è sa sviluppa per gronda part a l'intern dals cunfins da la provinza Raetia prima (Rezia romana).

Dal 6avel al 8avel tschientaner han ils Zaccos/Victorids occupà, per part en uniuon persunala, ils dus uffizis seculars ed ecclesiastics principals, numnamain quel dal preses e quel da l'uestg. Suenter il 806 ha Carl il Grond fatg da la Rezia in contadi francon. El ha separà la pussanza ecclesiastica da quella civila ed ils bains episcopals dal quels dal contadi (Currezia). Pli tard ha l'uestgieu da Cuira ertà parts dals bains imperials carolingics en Rezia. L'imperatur Otto I ha privilegià l'uestg Hartpert surtut a l'intern da la citad da Cuira ed en Bergiaglia ed ha stgaffi las premissas per la posiziun dominante dals uestgs da Cuira sco signurs feudals e prinzis imperials durant il temp autmedieval ed il temp medieval tardiv, savens en disfavour da la pastoraziun.

Al domini feudal dal prinzi-uest-



Curt episcopala a Cuira cun chastè e catedrala.

gieu da Cuira appartegnan la citad da Cuira, ils Quatter Vitgs, la Bergiaglia, il Surses, l'Engiadina, la Tumleas-tga, il Puschlav, la Val Müstair ed il Vnuost, en il temp autmedieval temporarmain era Clavenna e Buorm, en pli bains sparpagliads a l'exteriur da quest territori, p.ex. en il signuradi da Flums. Tranter ils vasals e ministerials dal prinzi-uestgieu eran las famiglias reticas las pli pussantas. La diocesa spirituala tanscheva dal Vnuost fin en la Val d'Ursera e dal Vorarlberg resp. da la Planira da la Linth fin en il Mesauc, ma senza la Val Puschlav. A la fin dal temp medieval era l'uestgieu da Cuira dividì en 8 decanats cun 183 pravedas.

Er l'istorgia da la Curt è colliada stretgmain cun il svilup da la diocesa. Il 1514 ha l'imperatur Maximilian I separà la Curt da la citad ed ha cedi ella a l'uestg en furma da feud imperial. Quest'enclava en il territori da las Trais Lias furmava la basa seculara per la posiziun da l'uestg sco prinzi imperial. La Refurmaziun ha effectuà la separaziun confessionala tranter la Curt episcopala e la citad burgaisa. Ils Artigels da Glion dal 1526 han pretendi la suveranità statala sur la diocesa da Cui-

ra, els han dentant concedi a l'uestg a l'intern da la Curt la suveranità da giustizia, il dretg d'asil, l'exemziun da taglias ed il privilegi da batter munaida. Il Recess da la Dieta imperiala dal 1803 ha mess ina fin a la pussanza seculara dal prinzi-uestg da Cuira, ed ils vischins da la Curt han surpiglià la dretgira e l'administraziun seculara. L'onn 1852 è la Curt vegnida unida cun la citad da Cuira tras conclus dal Cussegl grond.

La catedrala

Sco menziunà derivan ils origins da la catedrala da Cuira dal 5avel tschientaner. Tut auter ch'èn questa fasa da la cristianisaziun tempriva sa preschenta la situaziun demografica ed ecclesiastica en il temp autmedieval: Parallel cun l'augment general da la populaziun ed il svilup correspondent da la colonisaziun, crescha era il dumber da las baselgias en Currezia. Pitschnas communitads ecclesiasticas sa distagan da las vastas plais da champagna dal temp medieval tempriv ed i resulta ina gronda quantitat da novs edifizis sacrali. La construziun la pli impurtanta da l'epoca romana è la nova catedrala da Cuira.

L'edifizis sco el sa preschenta oz è vegnì bajegià tranter il 1151 ed il 1272. I sa tracta d'ina catedrala a trais navs, l'emprima da quest gener en territori grischun. Enfin là avev'ins mantegnì era en la construziun d'edifizis sacrali da prestige la sala da cult tradiziunala nunstructurada. Cun ses varga 700 onns sa tracta da la pli veglia catedrala situada al nord da las Alps. La catedrala è deditgada a Nossadonna (Ascensiu), ma quai è in fatg pauc enconuscent: gia da vegl ennà vegn ella simpelmain numnada «la catedrala».

Da la gotica datescha ina pictura sacrala dal Maister da Vuorz situada en il battisteri (circa 1330) e l'altar grond entaglià da Jakob Russ (circa 1490). Enturn il 1600 è l'edifizis vegnì cumplettà tras in clutger cun cupla barocca. La davosa restauraziun complessiva da la catedrala ha gi lieu tranter il 2001 ed il 2007. Il stgazi da la catedrala illustrescha cun objects liturgics custaiavels la lung'istorgia da l'uestgieu. Igl è previs da render accessibel quel al public en furma d'in pitschen museum, e quai en rom da la restauraziun dal chastè episcopala.

Baselgia da Son Gliezi

La baselgia da Son Gliezi sa basa sin in emprim edifizis sacral dal 4avel tschientaner tardiv. Da l'edifizis carolingic cun sala a trais absidas (probablmain da l'emprima mesadad dal 8avel tschientaner) è sa mantegnida sulettmain la cripta. Chats da fossas conferman la funcziun da Son Gliezi sco baselgia sepulcrala dals Zaccos/Victorids. Dal temp medieval tempriv n'existan naginas funtaunas segiras davart la baselgia, da la quala ins aveva engulà gia avant l'onn 821 las reliquias da Son Gliezi.

Il 1149 èn attestads muntgs premonstrats ch'eran sa domiciliads probablmain pauc avant a Son Gliezi. Lur convent era ina filiala da Roggenburg en Baviera ed appartegneva a la provinza svabaisa da l'urden respectiv. Il preses cumpara l'emprim sco priur, il 1156 sco prevost ed a partir dal 1186/91 sco avat, malgrà ch'il chapitel general ha conferi pir il 1453 a la claustra da Son Gliezi il status d'ina abazia.

Durant la Refurmaziun è vegnì executà il 1529 l'avat Theodor Schlegel, e la claustra è vegnida messa sut curatella da la Lia da la Chadé. Il 1539 èn ils bains claustrals vegnids attribuids sco feuds ereditars als vischins da Cuira. Il convent è s'exilià a Bendern/FL, nua ch'el è sa reduci a paucs commembers.

Las stentas energicas interpretadas da vart da la Chasa Habsburg per restituir la claustra han pussibilità il 1636 il return da quella a Son Gliezi.

Suenter la dissoluziun dal convent il 1806, è sa domiciliada ina congregaziun da redemptorists da Babenhausen (Baviera) a Son Gliezi. Suenter lur exiliaziun è ida la baselgia da Son Gliezi il medem onn al Seminari da spirituals bandischà da Meraun. Suenter reconstruziuns da la baselgia e da la claustra en il temp gotic tardiv, han ins cuntanschì il 1811 cun l'auzament da l'entir complex il stadi architectonic actual. La Scol'auta da teologia, a la quala Son Gliezi fa oz part, exista dapi l'onn 1968.

Restanzas da la baselgia da Son Steffan

Sut la piazza da pausa da la scola chantunala a la Halde sa chatta il monument architectonic il pli impurtant dal cristianissem tempriv en il Grischun: Son Steffan, la baselgia sepulcrala dals uestgs da Cuira, construida il 5avel tschientaner. Al cumenzament dal 17avel tschientaner han truppas austriacas destrui la baselgia e l'entir stabiliment è i en emblidanza. L'onn 1850, cur che l'emprima scola chantunala è vegnida construida, è la baselgia vegnida rescuvrida. L'architect Walter Sulser l'ha exchavà e perscrutà cumplettmain ils onns 1955/56. Cur che la scola chantunala è vegnida construida da nov ils onns 1970, è la baselgia vegnida cuvrida ed integrada sut terra en l'edifizis da scola. En il rom da la renovaziun totala ch'è vegnida terminada l'onn 2010 è questa localitad vegnida revalitada ad in museum che tegna quita da l'impurtanza da la baselgia.

L'istorgia e l'impurtanza da quest edifizis vegnan decleradas en moda illustrativa sin sis tavlas ch'èn repartidas en la localitad. Ils chats extraordinaris vegnan preschentads en ina vitrina. Il model da la baselgia sepulcrala preschenta tut ils detagls a la scala 1:10 e gida a chapir si'architectura e quella da la baselgia superiura ch'è vegnida construida pli tard suravia.

Il 5avel tschientaner è vegnì endrizza il stabiliment sepulcral per ils uestgs da Cuira sin il santeri che sa chatta al nordost da la catedrala. Quest stabiliment sa cumpona d'in local principal cun arviet e d'in pierren construi pauc pli tard. Il pierren vegniva er duvrà sco lieu da sepultura. Il local principal è dividì en 12 fossas circumdadas da mirs. En la paraid ost sa chatta in'apsidiola centrala che vegn accompagnada da tuttas duas varts da mingamai ina nischa da glisch. Sut l'apsidiola è il foss, nua ch'i sa chattavan las reliquias da Son Steffan.

Las paraids e l'arviet da la localitad sepulcrala èn ornads cun picturas magnificas. Sur la paraid cun l'apsidiola èn ordinads – en moda ascendenta da sanestra e da dretga – mingamai sis apostels. La zona dal fundament da las paraids era colorada cun alv. Suravia era tratg enturn tut il local in bindel che imitava intarsias da marmel. Sur quest lieu da sepultura è vegnida construida anc il 5avel tschientaner la baselgia superiura. Da la baselgia superiura èn mantegnidas restanzas dal plaun da mosaic. Il bindel cun musters da peltas, da cruciferas e da cors sa chattava oriundamain en il chor davos il banc mez radund dals sacerdots.

La preschentaaziun:

Dossier «Curt episcopala a Cuira».

Dapli infurmaziuns:

chatta.ch/?hiid=1809
www.chattà.ch



Restanzas da la baselgia da Son Steffan, accessiblas sco museum.